

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**Kalaallit Nunaanni ilisimatusarnernut tamanut ataatsimut qarasaasiami  
paasissutissanik katersivimmik pilersitsinissamik periarfissat misissorneqarnissaat  
pillugu Naalakkersuisut peqquneqarnissaannik Inatsisartuni aalajangiiffigisassatut  
siunnersuut.**

*(Inatsisartunut ilaasortaq Mimi Karlsen, Inuit Ataqtigiit)*

**Pillugu**

**ISUMALIUTISSIISSUTAA**

**Siunnersuutit aappassanneerpeqarneranni tunniunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap suliaqarnermini ukuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq  
Inatsisartunut ilaasortaq Laura Táunâjik, Siumut  
Inatsisartunut ilaasortaq Nivi Olsen, Demokraatit  
Inatsisartunut ilaasortaq Sofia Geisler, Inuit Ataqtigiit  
Inatsisartunut ilaasortaq Peter Olsen, Inuit Ataqtigiit (Sinniisoq)

UKA2018-imi ulloq 29. oktober 2018 siunnersuutip siullermeerlugu oqallisigineqarnerata  
kingorna siunnersuut ataatsimiititaliamit misissorneqarpoq.

**1. Siunnersuutip imarisaa siunertaalu;**

Siunnersuummi matumani siunertarineqarpoq ilisimatusarnernut tamanut ataatsimut  
qarasaasiami paasissutissanik katersivimmik pilersitsinissamik periarfissat  
misissorneqarnissaat.

**2. Ataatsimiititaliap siunnersuummik suliaqarnera;**

Siunnersuummi matumani **Kalaallit Nunaanni** ilisimatusaatigineqartut pineqarmata  
ataatsimiititaliamit erseqqissaatigineqassaaq. Taamaalillugu oqaatigineqassaaq **Kalaallit  
Nunaat pillugu** ilisimatusarnernik katersuiffimmik pilersitsinissamut periarfissanik  
misissuinissaq pineqanngitsoq erseqqissaatigineqarpoq. Ullumikkut Ilisimatusarfimmit

saqqummiussassanik immikkulli ilisimatusaatinik tamanut saqqummiussisoqartartoq ataatsimiititaliamit maluginiarneqarpoq. Taamaattorli ataatsimiititaliamit erseqqissarneqassaaq, Kandidatitut immikkut allakkiaq imaluunniit bacheloritut soraarummeerut imaangimmata immikkut ilisimatusaatigineqartut. Tassa, amerlanertigut ilisimatusarfimmi ilinniartunit inaarutaasumik suliaq/immukut saqqummiusseq kiisalu ilisimatusaatit allanik misissorneqarsimasut assigiinngitsuupput. Taamatuttaarlu ilisimatusarneq profisionsbachelorimut qitiusuunngilaq, taannami taaguutaata innersuussinera malillugu tassaammat aalajangersimasumik suliaq – imaassinnaavoq, (meeqqat atuarfini) ilinniartitsisoq, peqqissaasoq il.il.

Siunnersuut manna ilusimisut isikkoqartillugu akuerineqassagaluarpas eqqarsaatigineqartariaqassaaq saqqummersitassat sorliit, ilisimasanik toqqorsivinnut ilanngunneqassanersut, kiisalu ersarissumik malittarisassiuunneqassallutik saqqummersitat qanoq ersaritsigitinneqarnissaat.

Tungaviatigut ataatsimiititaliamut pissusissamisoorpoq ilisimatitsissutit ilisimasallu agguanneqartarnissaat – ilisimatusarluni ilinniarfinni kiisalu ilinniarfinni allani. Pingaartumik nunami maani ilisimatusartut taama ikitsigitillugit. Taamaattorli ilisimatusaatit assigiinngitsunik pisariaqartunik pissuteqartumik killilimmi saqqummiunneqarsinnaasarneri ataatsimiititaliamit akuerineqarpoq. Imaassinnaavoq tamakku nunami sillimaniarnermut, imaluunniit inussutissarsiornermi immikkut soqutiginarturnut tunggassuteqartut. Tamanna aamma nunani allani takornartaanngilaq.

Ilisimasanik katersuiffiup qanoq annertutigisumik peqataatinneqarnissaa, pissusaaffiussanersooq imaluunniit piunassuseq tunggavigalugu toqqorterissanersooq, siunnersuummi nalilerneqanngitsoq ataatsimiititaliamit maluginiarneqarpoq. Tamanna tunggavigalugu Naalakkersuisut kaammattorneqassapput siunnersuut ilusimisut isikkoqartillugu akuerineqassappat pissutsit taakku eqqarsaatigeqqullugit taamatuttaarlu “Kalaallit Nunaanni suliarineqarsimasooq” qanoq annertutigisumik paasineqassanersooq Naalakkersuisut eqqarsaatigisariaqarpaat. Ilisimatusarnerup ilaannaa Kalaallit nunaani ingerlaneqarsimassava? Ilisimatusarneq Kalaallit Nunaanni ilisimatusarfimmut imaluunniit ilinniarnermut attuumassuteqassava? Ilisimatusartooq ilisimatusarnerup nalaani Kalaallit Nunaanniissava? Aaqqiissutissamik nassaarniarnermi Naalakkersuisut tamakku eqqarsaatigissagaat ataatsimiititaliaq tunggaviatigut isumaqarpoq.

Ilisimatusarnermi HUB-imik taagorneqartumik pilersitsinissaaq Naalakkersuisut siunnerfigisartik suliaralugu aallarereersimagaat ataatsimiititaliamit ilanngullugu maluginiarneqarpoq, Kalaallillu Nunaanni ilisimatusaatit saqqummiunneqartarnerinik aaqqiussusaasumik suliaqarnermi sakkussatut atorineqarsinnaasutut atorluarneqarsinnaasoq ataatsimiititaliamit ilanngullugu maluginiarneqarpoq.

**3. Siunnersuutip aningaasatigut kingunerisassai:**

Inatsisartut suleriaasianni § 33. Imm. 1-mi allassimasut tunngavigalugit siunnersuutip piviusunngortinneqarnerani aningaasartuutit allaffissornermilu kingunissaritinneqartut siunnersuutip oqaaseqaataanut ilanngunneqassapput.

Siunnersuutip piviusunngortinneqarnerani AC-mik atorfillip qaammatit pingasut sulinerata naligissagaat siunnersuuteqartumik nalilerneqarpoq, tassa ukiumut aningaasartuutissat 125.000 kr. Tamatumunnga ataatsimiititaliaq allatigut oqaaseqaatissaqanngilaq.

**4. Ataatsimiititaliap inassuteqaataa**

Ataatsimiititaliap **isumaqatigiissup** siunnersuut **akuersissutigineqassasoq** innersuutigaa.

Taamatut oqaaseqarluni isumaliutissiisummilu allassimasutut paasinnillutik matumuuna siunnersuut ataatsimiititaliap aappassaanniigassanngortippaa.



Doris J. Jensen  
Siulittaasoq




Laura Táunâjik



Nivi Olsen



Sofia Geisler



Peter Olsen